

元旦古诗大全

1.
节启青阳岁籥新，金人十二画为神。韶华自合留天府，御气谁期洽近臣。
彩胜仍分仙禁缕，云屏况借汉宫春。却怜寂寞扬雄宅，门巷恩光接紫宸。
——于慎行《元旦赐门神挂屏葫芦等物岁以为常》

2.
试题春帖纪新年，霭霭青云起砚田。展卷不知山是画，举头恰喜屋如船。
梅花雪后开无数，杨柳风前困欲眠。怅望关河无限恨，呼儿沽酒且陶然。
——王冕《庚辰元旦》

3.
钟鼓高城送腊徂，云霞曙色上桃符。日随岁月开三始，春与莺花到五湖。
借宅南山非捷径，对人故态是狂奴。依然旧识东风面，柳眼青青向酒垆。
——居节《壬午元旦》

4.
缠天兵气惨难春，日历无端判故新。稍慰哀情闻吉语，强开恶抱答佳辰。
才名薄俗宜遭贱，世味贫家最识真。不肯教闲书胜笔，偶拈题句已如神。
——钱钟书《甲申元旦》

5.
牢落临溪宅，蹉跎抱古心。老惊残岁改，醉恋远钟沉。雁鹜穿霄避，豺狼拥窟深。
犹期烽燧外，钟岭引孤吟。——陈三立《尧衢写寄元旦之作依韵和酬》

6.
亿万饥民久籲天，天开上瑞岂徒然。深潭龟拆寒莎底，浅土蝗遗宿麦边。
厉气已消除日后，祥霏飞堕晓风前。醉吟楼上瀛洲客，为记三登第一

年。——刘宰《和罗權丞尊经阁元旦观雪》

7.
使者双瓶至，蓬门向晚开。停肩慰泥滑，解冱省香来。染指怜佳味，挑灯引细杯。明朝携小榼，江上候新梅。——沈周《元旦后一日刘德仪送酒（成化戊戌）》

8.
六载虚劳供奉恩，白头吾亦两朝臣。闾阎击壤今弘治，简册编年又戊申。日色小薰秣李昼，风光欲醉乳莺春。庐冈此景谁分付，也到江门不属人。——陈宪章《元旦试笔（二首）》

9.
云物当楼俨列陈，微阳在水映杯新。久同穷鸟依寒木，休问群魔塞要津。氛祲不开迷故国，斧斤所赦托遗民。只成阅世加餐饭，痴抱犹期岳降申。——陈三立《次和倦知丙寅元旦作》

10.
东风吹鼓柳梢雪，一夜挽回天下春。从此阳春应有脚，百花富贵草精神。——白玉蟾《元旦在鹤林偶作》

11.
五十今朝过，谈经滞海滨。天阴不见日，地冷未知春。染翰题新语，开襟待故人。宫花遍朝士，那上小乌巾。——贝琼《甲辰元旦》

12.
劳生九十漫随缘，老病支离幸自全。百岁几人登耄耋，一身五世见曾玄。只将去日占来日，谁谓增年是减年。次第梅花春满目，可容愁到酒樽前。——文徵明《戊午元旦》

13.
淡日泊在扶桑边，四山浮云来蔽天。本是阳和变杀气，发出燥土如云烟。吾皇神圣来赫怒，诸公饱饭日晏然。去年五月南海翻，九月三边烽火连。旅人潦倒衰暮年，有怀明主徒拳拳。袖中常怀书一编，不得上陈徒

自怜。有时问天天不语，仰天大笑龙楼前。不如回去长安市上酒家眠，明日收拾东归理钓船。——王佐《己丑元旦过承天门作是日大风》

14.

天上风云庆会时，庙谟争遣草茅知。邻墙旋打娱宾酒，稚子齐歌乐岁诗。老去又逢新岁月，春来更有好花枝。晚风何处江楼笛，吹到东溟月上时。——陈宪章《元旦试笔（二首）》

15.

共庆新年笑语哗，红岩士女赠梅花。举杯互敬屠苏酒，散席分尝胜利茶。只有精忠能报国，更无乐土可为家。陪都歌舞迎佳节，遥祝延安景物华。——董必武《元旦口占用柳亚子怀人韵》

16.

不管鬢鬆雪满颠，笔床茶灶度年年。穷愁博得长清健，多折梅花供老天。——艾性夫《元旦》

17.

云封高岫护将军，霆击寒春灭下民。到底不如租界好，打牌声里又新春。——鲁迅《二十二年元旦》

18.

闽中风景丽，元旦百花开。有岸皆藜草，无波不染苔。树光摇粉堞，云彩照金罍。浓黛新年点，春衣隔岁裁。夜垆藏宿火，晓烛剪残灰。袖里分余蕙，钗边胃落梅。松枝当户插，椒气拂窗来。正好随欢笑，那知客思催。——吴兆《元旦书事（甲辰）》

19.

莫道新年贺客迟，晴天暖日却相期。春风只被多情苦，红嫩青新总要诗。——谢枋得《元旦阻雨二首》

20.

倍还春色渺无凭，乱里偏惊易岁勤。一世老添非我独，百端忧集有谁分。焦芽心境参摩诘，枯树生机感仲文。豪气聊留供自暖，吴箫燕筑断知

闻。——钱钟书《乙酉元旦》

21.

洪钧一转岁开端，草木群生亦喜欢。安得明年此时节，江东重睹旧衣冠。
——谢枋得《元旦阻雨二首》

22.

夜来人散残更月，晓陌空存旧车辙。彩灯城市已春风，寒木人家犹腊雪。
强起相逢酒未醒，残膏宿火尚荧荧。归来更拂障泥锦，重约黄昏信马行。
——张耒《上元旦早起赠同游者》

23.

城阙春潜雪尽融，谁家花胜出王宫。更寒缓下葳蕤锁，元旦催传进乐工。
——程可中《除夕太原府四首》

24.

青帝初传令，山河万象新。圣恩宽似海，世态乐同春。拜阙难辞老，居官岂为贫。
京华望不远，感激切微臣。——史弥忠《元旦望阙叩头而作》

25.

傍城山曲处，草径一居幽。元夕孤灯里，残香静夜头。久晴无苦冷，独坐祇清愁。
也拟寻诗句，吟哦醉却休。——郑刚中《元旦二首》

26.

花枝含笑画犹存，偕老浑忘岁月奔。红烛高烧人并照，绿云低覆镜回温。
新妆几换孤山面，浅笔终留倩女魂。珍重玳梁香雪影，他生同认旧巢痕。
——陈寅恪《甲午元旦题曾农髯丈所画齐眉绶福红梅图》

27.

数我初生岁，今为第二年。光阴六十过，行辈几人全。试把新诗写，闲将好梦圆。
儿孙扶出拜，苏酒让渠先。——舒岳祥《庚辰元旦试笔》

28.

夕转清壶漏，晨惊长乐钟。逶迤纶禁客，假寐守铜龙。予亦趋三殿，肩随谒九重。繁珂接曙响，华剑比春容。相问韶光歇，弥怜芳意浓。愿言乘日旰，携手即云峰。——徐彦伯《同韦舍人元旦早朝》

29.

熙朝政化谨三元，有事郊南典礼全。嗣圣万年初见帝，小臣十起夜瞻天。想回玉辂红云晓，更揭金鸡暖雨前。但愿庆成天下福，赋诗岂必从甘泉。——陈杰《元旦南郊庆成》

30.

不嫌朱户有蒿蓬，且喜阳和转谷中。人语半空山殿晓，佛香匝地洞门风。酒随天意留青缥，诗与春光斗碧红。况值朋来好乘兴，肯因灊滑限西东。——程嘉燧《己卯元旦和牧翁韵》

31.

腊尽寒犹厉，春来雪未乾，流年怜易失。为客敢求安。故里屠苏酒，新年柏叶盘，嗟哉老兄弟，谁与共清欢。——何汝樵《元旦》

32.

正月烧灯夜，封川转觉幽。十分凭月色，数点照城头。俗习那知陋，安陵谅不愁。家家松火畔，舂米未曾休。——郑刚中《元旦二首》

33.

密炬瑶霞光颤酒。翠柏红椒，细翦青丝韭。且劝金樽千万寿。年时芳梦休回首。小雨轻寒风满袖，下却帘儿，莫遣梅花瘦。万点鹅黄春色透。玉箫吹上江南柳。——黎廷瑞《蝶恋花（元旦）》

34.

日出潮回生紫烟，水光春色弄春妍。底须椒柏来为颂，且与鸥鳧叙隔年。风动微波靴面皱，苔粘枯石佛头圆。老来须与溪童乐，争倚芦花学放船。——丘葵《元旦与可大江行》

本文链接：<https://duanjuziku.com/duanjuzi/p2f09pmcif.html>